

Kapisilinniarneq pillugu Namminersorlutik Oqartussat nalunaarutaat

Aalisarneq pillugu Inatsisartut inatsisaanni nr. 18, 31. oktober 1996-imeersumi §§ 5, 8, aamma 10, § 10a-mi imm. 1, § 13, imm. 2, §§ 23, 25, aamma 26, § 33-mi, imm. 2 aamma § 34, imm. 3, kingullermillu Inatsisartut inatsisaatigut nr. 28, 28. november 2016-imeersukkut allanngortinneqartoq naapertorlugit aalajangersarneqarpoq:

Kapitali 1

Atuuffia atuuffigisaanullu nassuiaatit

Atuuffia

§ 1. Nalunaarut una Kalaallit Nunaata aalisarnikkut oqartussaaffigisaani kapisilinniarnermut atuuppoq:

- 1) Nunap Isuata kitaani NAFO-p sumiiffilersuiiffiani 1. Tunngaviusumik killigititami 40 sømilit avataanni kapisilinniarneq inerteqqutaavoq.
- 2) Kalaallit Nunaata Kangiata aalisarfiini. Taamaattoorli paragraffit tulliuttut kisimik atuutissapput, tassalu: § 6, § 7, § 8, § 9, § 10, § 11, § 12, § 13, § 14, § 15 aamma § 16. Tunngaviusumik killigititami 12 sømilit avataani kapisilinniarneq inerteqqutaavoq.
- 3) Kapisillit kuuani kapisilinniarnermi.

Nassuiaatit

§ 2. Nalunaarummi matumani Inuussutissarsiutigalugu aalisarneq paasineqassaaq pisat tamaasa ilaannaasaluunniit tuniniarnissaat siunertaralugu aalisarnertut.

Imm. 2. Inuussutissarsiummut atatinagu kapisilinniarneq nalunaarummi matumani paasineqassaaq nammineq atugassanik kapisilinniarnerut.

Imm. 3. Kapisilinnik pisineq nalunaarummi matumani paasineqassaaq inunnit kapisilinniarnissamut akuersissummik allagartaqartunit toqqaannartumik pisineq tiguserlu.

Kapitali 2

Inuussutissarsiutigalugu kapisilinniarneq

Inuussutissarsiutigalugu kapisilinniarnermut piumasaqaatit

§ 3. Inuussutissarsiutigalugu kapisilinniarnissamut akuersissummik allagartallit kisimik nalunaarutip atuuffigisaani pisarineqarsimasunik kapisilinnik tuniniaasinnaatitaapput.

§ 4. Inuussutissarsiutigalugu kapisilinniarsinnaanermut allagartat akuersissutit qinnuteqareermermi Naalakkersuisunit tunniunneqartut piumasaqaataapput.

Imm. 2. Aalisarsinnaanermut akuersissut qinnuteqartunut piumasaqaatinik makkuninnga naammassinnittunut taamaallaat tunniussisoqarsinnaavoq:

- 1) Qinnuteqartoq inuiaqatigiinnut kalaallinut aalajangersimasumik attuumassuteqartuussaaq, aalisarneq pillugu Inatsisartut inatsisaanni § 3-mi, imm. 4 naapertorlugu.
- 2) Inuussutissarsiutigalugu aalisarsinnaanermut piumasaqaatit Inatsisartut aalisarneq pillugu inatsisaat § 6, imm. 3, naapertorlugu naammassinnissimassapput.
- 3) Qassutit kapisilinniutit aamma angallammik kapisilinniummik 12,8 meterit (42 fod) tikillugit tamakkerlugu takissusilimmik qinnuteqartup nammineq pigisaqarnissaa.
- 4) Qinnuteqarnermut atatillugu qinnuteqartumit pigineqartut qassutit kapisilinniutit qassiunerinik qanorlu ittuunerinik imaluunniit ilisarnaataannik qinnuteqartoq ilisimatitsissaaq.
- 5) Qinnuteqartunut aalisarnerup siuliani akuersissummik peqarsimasunut aalisarnerup siuliani nalunaaruteqartussaataaneq pillugu § 9 aamma § 16 naapertorlugu naammassinnissimassapput.

Inuussutissarsiutigalugu kapisilinniarnermi piniutit

§ 5. Uku taamaallaat atorlugit inuussutissarsiutigalugu kapisilinniartoqarsinnaavoq:

- 1) qarsorsat, imaluunniit
- 2) qassutit 20-t tikillugit tasillugit minnerpaamik 140 mm-inik nigartallit atorlugit aamma taakkunanit amerlanerpaamik qassutit 5-t imminnut qilersimasinnaapput.

Imm. 2. Qassutit nigartaat uuttorneqassapput uuttuutit $\frac{1}{2}$ kilomik oqimaalutserlugu nigartanut ikkunneratigut nakkartinneratigullu. Qimiaa puttalatitsisoq atuarlugu nigartat 20-t qimiaanut ungaseqatigiit uuttorneqassapput. Nigartat tamarmik imm. 1-imi, nr. 2-mi piumasaqaat eqqortissavaat.

Imm. 3. Qassutit kapisilinniutit atorineqartut tamarmik piginnittup aqqanik imaluunniit taassuma angallataata aqqanik normuanillu nalunaaqutsersugaassapput. Nalunaaqutsiussat imermit arrortinneqarsinnaassanngillat.

Imm. 4. Silap pissusaata taamaattoqartissinnaappagu qassutit kapisilinniutit akuttunngitsumik akulikitsumillu qassusiarfigineqartassapput, pisat uumanissaminnut periarfissaat ajornerulertussaajunnaarlugit.

Inuussutissarsiutigalugu kapisilinniarnernup aqqqissuussaanera

§ 6. Inuussutissarsiutigalugu kapisilinniarneq pisassiissutit aallaavigalugit nunami tunitsivinnut tunisassanik imaluunniit najukkani kalaalimineerniarfinnut najukkamilu suliffeqarfinnut tuniniarneqartussanik aalisarnertut ingerlanneqarsinnaavoq.

§ 7. Inuussutissarsiutigalugu aalisarnermut Naalakkersuisut ukiut tamaasa, nunat tamalaat akornanni isumaqatigiissutit eqqarsaatigalugit, Kalaallit Nunaanni kapisilittassanik aalajangersaassapput.

Imm. 2. Naalakkersuisut KNAPK-lu isumasioqatigereerlugu inuussutissarsiutigalugu kapisilinniarnissamut ulloq aallartiffissaq aalajangertassavaat. Ulloq aallartiffissaq nuna tamakkerlugu tusagassiutit aqqutigalugit nalunaarutigineqartassaaq.

Imm. 3. Inuussutissarsiutigalugu kapisilinniarnermi pisat Kalaallit Nunaata avataani taamaallaat pisiariortorneqarsinnaapput tuniniarneqarsinnaallutillu Naalakkersuisut akuersissuteqarnerisigut.

§ 8. Pisassiissutit tamakkerlugit pisarineqarnissaat qanillippat, Naalakkersuisut nalunaarutigissavaat, qaqugu inuussutissarsiutigalugu kapisilinniarneq kiisalu taamatut aalisarnermit pisanik pisineq aamma tunisineq unissanersoq. Nuna tamakkerlugu tusagassiutit aqqutigalugit nalunaarutigineqassaaq.

Inuussutissarsiutigalugu kapisilinniarnermi pisanik nalunaaruteqarneq

§ 9. Kapisillit pisarineqartut tamarmik Kalaallit Nunaanni Aalisarnermik Akuersissutini Nakkutilliisoqarfimmut (KANUAANA) erngertumik nalunaarutigineqartassapput.

Imm. 2. Inuussutissarsiutigalugu aalisarnissamut akuersissutillit kalaalilimineerniarfinni toqqaannaq tunisartut kapisilinnik tulaassinerit tamaasa nalunaaruteqartassapput. Nalunaaruteqarnermi kapisillit pisat tulaanneqartut tamarmik ilaatinneqassapput. Nalunaaruteqarneq ilanngussaq 1 naapertorlugu paasissutissanik tamanik imaqaassaaq aamma tamanna Sullissivik.gl aqqutigalugu imaluunniit KANUAANA, Postboks 501, 3900 Nuuk, Telefax 34 63 60 imaluunniit e-mailikkut gflk@nanoq.gl-mut nalunaaruteqarnikkut.

Kapitali 3

Inuussutissarsiutiginagu kapisilinniarneq Inuussutissarsiutiginagu kapisilinniarnermut piumasaqaatit

§ 10. Inuussutissarsiutiginagu kapisilinniarnissamut akuersissut qinnuteqareernikkut Naalakkersuisunit tunniunneqartassaaq.

Imm. 2. Imm. 1 malillugu qinnuteqartunut piumasaqaatinik makkuninnga naammassinnittunut taamaallaat akuersissutini tunniussisoqarsinnaavoq:

- 1) Aalisarnek pillugu Inatsisartut Inatsisaanni § 8-mi, imm. 1-mi piumasaqaatinik naammassinnissimasut.
- 2) Qinnuteqartunut aalisarnerup siuliani akuersissummik peqarsimasunut aalisarnerup siuliani nalunaaruteqartussaataaneq § 15 aamma § 16 naapertorlugit naammassinnissimasunut.

Inuussutissarsiutiginagu kapisilinniarnermi piniutit

§ 11. Uku taamaallaat atorlugit inuussutissarsiutiginagu kapisilinniartoqarsinnaavoq:

- 1) qarsorsat, imaluunniit
- 2) qassutit (ataatsit) 2000-nik qilernillit, taakkua tasillugit nigartaat minnerpaamik 140 mm-iusut.

Imm. 2. Qassutit nigartaat uuttorneqassapput uuttuutit ½ kilomik oqimaalutserlugu nigartamut ikkuneratigut nakkartinneratigullu. Qimiaa puttalatitsisoq atuarlugu nigartat 20-t qimiaanut ungaseqatigiit uuttorneqassapput. Nigartat tamarmik imm. 1-mi, nr. 2-mi piumasaqaat eqqortissavaat.

Imm. 3. Qassutit piginnittup atii tamaasa ilanngullugit nalunaaqutsigaassapput. Nalunaaqutsiussat imermi arrortinneqarsinnaassanngillat.

Imm. 4. Silap pissusaata taamaattoqartissinnaappagu qassutit kapisilinniutit akuttunngitsumik akulikitsumillu qassusiarfigineqartassapput, pisat atorluarneqarsinnaanissaat ajornerulerseqqunagit.

Inuussutissarsiutigiginagu kapisilinniarnernup aaqqissuussaanera

§ 12. Inuussutissarsiutigiginagu kapisilinniarneq pisassiissuteqarnikkut ingerlanneqarsinnaavoq.

§ 13. Inuussutissarsiutigiginagu kapisilinniarnermut, Naalakkersuisut ukiut tamaasa nunat tamalaat akornanni isumaqatigiissutit naapertorlugit kalaallit kapisilittassaannik aalajangersaassapput.

Imm. 2. Inuussutissarsiutigiginagu kapisilinniarneq inuussutissarsiutigalugu kapisilinniarnernup aallarteqatigissavaa, § 7, imm. 2 naapertorlugu.

§ 14. Kapisilittassiissutit aalajangikkat tamakkerlugit pisarineqarnissaat qanillippat, Naalakkersuisut nalunaarutigissavaat, qaqugu inuussutissarsiutigiginagu kapisilinniarneq unitsinneqassanersoq. Nuna tamakkerlugu tusagassiutit aqqutigalugit nalunaarutigineqassaaq.

Inuussutissarsiutigiginagu kapisilinniarnernit pisanik nalunaaruteqarneq

§ 15. Inuussutissarsiutigiginagu kapisilinniarnermi kapisillit pisarineqartut tamarmik KANUAANA-mut nalunaarutigineqassapput.

Imm. 2. Pisat pillugit nalunaarutiginninneq nalunaarummi ilanngussaq 1 imaluunniit Sullissivik.gl aqqutigalugu pisassaaq. Kapisilinnik qassutininik napitaajaanernup kingornatigut, § 11, imm. 4 naapertorlugu nalunaarutiginninneq apuutereernermi erngertumik uunga nassiunneqartassaaq: KANUAANA, Postboks 501, 3900 Nuuk, Telefax 34 63 60 imaluunniit e-mailikkut gflk@nanoq.gl.

Kapitali 4

Inuussutissarsiutigalugu inuussutissarsiutigiginagulu kapisilinniarnermi pisaqanngitsoornernik O-imik nalunaaruteqarneq

§ 16. Inuussutissarsiutigalugu inuussutissarsiutigiginagulu kapisilinniarnissamut akuersissutaatillit tamarmik kapisilinniarsimangitsut tamanna pillugu ilanngussaq 1 atorlugu nalunaarutigissavaat.

Imm. 2. Inuussutissarsiutigalugu inuussutissarsiutigiginagulu kapisilinniarnissamut akuersissutaatillit tamarmik kapisilinniarsimasut tamanna pillugu ilanngussaq 1 atorlugu nalunaarutigissavaat.

Imm. 3. Akuersissutininik atorneqanngitsunik aamma pisaqanngitsoornernik nalunaaruteqarneq nalunaarummut ilanngussaq 1 aqqutigalugu pissaaq. Nalunaaruteqarneq kingusinnerpaamik kapisilinniarnernup matuneraniit ullut 14-init kingorna KANUAANA-mut, Postboks 501, 3900 Nuuk, Telefax 34 63 60 atorlugu imaluunniit e-mail gflk@nanoq.gl atorlugu nassiunneqassaaq.

Kapitali 5

Kapisillit kuuani kapisilinniarneq

§ 17. Kapisillit Kuuanniit kapisilinniarnermut pisassiissutit aamma ulloq aallartiffissaq ukiut tamaasa Naalakkersuisunit aalajangersarneqartarpoq.

Imm. 2. Kapisillit Kuuanni taamaallaat nammineq atugassanik aalisartoqartassaaq. Aalisarnermi tassani piumasaqaataavoq akuersissut qinnuteqareermermi Naalakkersuisunit tunniunneqartassasoq.

Imm. 3. Imm. 2 malillugu aalisarsinnaanermut akuersissut qinnuteqartunut piumasaqaatinik makkuninnga naammassinnittunut tunniunneqarsinnaavoq:

1) Aalisarnek pillugu Inatsisartut Inatsisaanni § 8, imm. 1-imi piumasaqaatit.

2) Qinnuteqartunut aalisarnerup siuliani akuersissummik peqarsimasunut aalisarnerup siuliani nalunaaruteqartussaataaneq §§ 15 aamma 16 naapertorlugu naammassinnissimasunut.

Imm. 4. Kapisillit Kuuata paavani 1000 meter-imit qaninnerusumut qassuserneq inerteqqutaavoq.

Imm. 5. Kuummi taamaallaat qissattaat ataasiinnarmik qarsorsalik atorlugu aalisartoqarsinnaavoq.

Imm. 6. Kapisillitassiissutit tamakkerlugit pisarineqarnissaat qanillippat, qaqugu kapisilinniarneq unissanersoq nuna tamakkerlugu tusagassiutit aqutugalugit Naalakkersuisunit nalunaarutigineqassaaq. Naalakkersuisut aalajangiisinnaapput, tamatuma kingorna aalisarnerit tamarmik nalunaaruteqartusnaanertalerlugit aalisakkat pisareriarlugit imaanut uterteqqittarlugit aalisarnertut ingerlanneqassasut.

Kapitali 6

Pineqaatissiissuteqartarnek

§ 18. Unioqutitsinerit pinerluttulerineri inatsimmi malittarisassat naapertorlugit akiliisitsissummik arsaarinnissummilu pineqaatissinneqarsinnaapput § 1-imi, nr. 1-imi aamma nr. 2-mik, §§ 3-mik, aamma 4-mik, § 5-imi, imm. 1-imi, imm. 3-mik aamma imm. 4-mik, § 7-imi, imm. 3-mik, 4-mik aamma 5-imi, § 8-mi, imm. 3-mik, § 9-mik, § 10-mi, imm. 1-imi, § 11-mi, imm. 1-imi, imm. 3-mik, aamma imm. 4-mik, § 13-imi, imm. 3-mik, § 14-imi, imm. 3-mik, aamma §§ 15-imi aamma 16-imi.

Imm. 2. Ingerlatseqatigiiffit il.il. (Inatsisilerineri immikkoortut inuttut isigineqarsinnaasut) Pinerluttulerineri inatsimmi kapital 5 naapertorlugu akisussaatinneqarsinnaapput.

Imm. 3. Pinerluttulerineri inatsimmi arsaarinnittarneq pillugu malittarisassat taamatuttaaq atorineqarsinnaapput.

Imm. 4. Akiliisitsissutit Nunatta Karsianut pisassanngortinneqassapput.

Kapitali 7

Atortuulersitsineq

§ 19. Nalunaarut ulloq 1. august 2021 atuutilissaaq.

Imm. 2. Peqatigitillugu Namminersorlutik Oqartussat kapisilinniarneq pillugu nalunaarutaat nr. 32, 28. august 2020-meersoq atorunnaarsinneqassaaq.

Aqqaluaq B. Egede
Aalisarnermut Pininarnermullu Naalakkersuisoq

/ Jørgen Isak Olsen

Namminersorlutik Oqartussat
Imaneq 4
3900 Nuuk
E-mail: nsninatsit@nanoq.gl

Linkit iluaqutaasussat

Kalaallit Nunaanni inatsisinut nalunaarutit
Namminersorlutik Oqartussat inatsisinut toqqorsiviat
Naalakkersuisut